



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

**TAPAK 3**

Yangia anidakangma :



Tir Yimyim



tir\_yimyim



tir yimyim

**TAPAK 7**

Bahutule Punjab Kings spin bowling coach kumogo

US Tir Donald Trump-i Russia asoshi sanctions tasen benoker



VOL. XXIII ISSUE NO. 17 (ADOK 17) DIMAPUR ROGONÜ (FRIDAY) MONGPUTENI (OCTOBER) 24, 2025

₹ 5.00

## Nagaland sorkar mapa inyaker temi longkak aitba tali ulushitsü

**Dimapur, Mongputeni/Oct. 23 (TYO):** Indian Administrative Service (IAS) shimba yimya nung tim masüba mapa inyaker ta tai tonglokja CANSSEA, FONSESA, NF&ASA, NSSA aser NIDA ajanga kumtetba Joint Coordination Committee (JCC)-i tang telidak pen-down aser tools-down strike tali ulishitsü sangdongogo.

Brehostibarnü sangdong ka agütsüba nung committee ajanga ashiba agi, October 19 nü All Nagaland Government Drivers' Association, Nagaland Civil Secretariat Drivers' Association, All Nagaland Directorate & District Government Drivers' Union, aser Nagaland Civil Secretariat Grade-IV Staff Employees Association den senden ka amenba mapang October 27 nü nungi tenzüka longkak aitba yimya tesashiba akumtsü pangzüng ka renema liasü.

"Pen-down strike tenzüker anogo ter ajunger aser sorkar dak iba ken o bentettsü tejangraba mesayur asünungji, selection process nung political establishment dena lir ta angateter, anungji IAS induction inyakyim nung temsüa alirtem masü saka tim masüba mapa inyaker 'favouritism' aliba jangjatsür," ta sangdong ajanga ashi.

Pei sapuba candidate shimtsü mechi sorkari inyakyim nung aibelenba nem tai tongloktsür aser bureaucracy tenüng asener, ta parnoki ashi.

Mezüng March 10, 2025 nung vacancy sangdong tanaben sangdongshia aser panel list nungi "non-NPSC/backdoor candidate" agiena sorkari ochi mapa tanaben meinyak tashi phase lemsar maneni democratic yimya nung longkak aittsü, ta JCC ajanga metetdaksü.

## Nirmal Jain ken o nung sorkari telangzüba agüjang: DNSU

**Dimapur, Mongputeni/Oct. 23 (TYO):** Nirmal Jain ken o dak sendakba nung Nagaland sorkari tang tashi mapa kecha meinyakba atema Dimapur Naga Students' Union (DNSU) ajanga tebilemtsü akaba lemsatepa liasü.

DNSU-i iba ken o temai adokja nüngdakba kuli ajak tapet ketdangsür nem agütsür ita trok ajunger. Ajisüaka tang tashi sorkar nungi telangzüba kecha mali, ta DNSU-i ashi.

Dimapur indang Deputy Commissioner-ia district ajanga ngutetba osang tem Commissioner of Nagaland nem agütsür ita ka dak tema lir. Ajisüaka tang tashi sorkari mera agiba osang kecha onok dangi arua mali, ta DNSU-i ashir.

Naga nungertemi iba ken o yongyaseta ataa lir, aser sorkari iba ken o nung telemtetba agiba ya nüburtemi kanga junga repranga atatsü aser bendangtsü, ta parnoki Nagaland sorkar dang ashi.

DNSU-isa Nirmal Jain dak sendakba nung ali ayokba aser aliba mesüra pa den yaritepba kija aser lokti kar danga lira, Union aser nüburtemi anema nokdaksü ta ashi.

Naga nunger temeden wazüka ayutsü tangatetba nung onok ajang-ajanga nokdaka lir aser sorkari ano maneni mera kecha magi yamai senzüka yutsüra onoki democratic yimya nung longkak ait tenzüksü, ta DNSU sangdong ajangasa metetdaksü.

## Phaipijangyimdak kitsük-kirong lendong atalok

**Dimapur, Mongputeni/Oct. 23 (TYO):** Brehostibarnep Phaipijang yimtsüng nung kitsük-kirong lendong ataloka kibong 30 shi talidak ki makai kumogo. Ajisüaka iba lendong nung yiruba mesüra asü-amaba osangbo mali.

Fire station osang ajanga ashiba agi, yinjong tonga aliba ki timba sür ki row trok okshia rongdoka kibong 20-30 tsüngta dak kongshi. Iba mi lendong ya electrical short circuit nungi

adok südi ta temulung melemteti lir saka ano mejangjateti lir.

Iba kitsüpkirong lendong ajurua alirtem ya timba non-local aser anogoshi aayanga senzürtem lir, shirnoki pei jurila kulizüng kaket tem densema osettsüset kecha magizüktet aser nisung karbo iba lendong nung sen samaba osanga lir.

Central Fire Station Dimapur nungi fire tender asem yoka minute 50 shi nung mi remsepteta liasü.



Minister, Tourism and Higher Education, Government of Nagaland, Temjen Imna Along-i October 23, 2025 nü Conference Hall, NH New Delhi nung osangbener den jembidang tangokba noksa nung angur. Nagaland House, 29-Dr. APJ Abdul Kalam Road, New Delhi nung October 24-25, 2025 anogotem Autumn Festival akatsü aliba dak sendakba nung pai osangbener den jembia liasü.

## Asendenshir meimchir asoshi mapa tajung inyaktsüla: CM Rio

**Kohima, Mongputeni/Oct. 23 (TYO):** Chief Minister aser Indian Red Cross Society, Nagaland State Branch (IRCSN) indang Vice President, Dr. Neiphiu Rio-i humanitarian service aser voluntary mapa atema asendenshir bendanga agüja inyaktsü Brehostibarnü ayongzüker.

Red Cross Complex, Kohima nung IRCSN pur 38 buba Annual General Meeting alidang Rio-i 2024 World Red Cross and Red Crescent Day indang omen "Keeping Humanity Alive" bilemteta, lendong-tsüdong, rara aser pandemics ama timtem agi alima sünga liaka iba omen yagi nisung meimchir ya society indang tashi tulutiba ta sayur, ta ashi.

"Ibai yimyim ka kisüng masü, ibai inyaktsü ayongzükerba: teyari nüngdaka alirtem den nokdaksü, shisabulu nung alir mulungjang nung tesuneptsüba agütsütsü, aser mebensai tenzüksü atema lir," ta pai ashi.

Iba inyakyim nung lanur tali arua shilem agütsü nüngdaker aser kongsangtem tashi itshitsüla, humanitarian mapa ulushitsüla aser lanurtem ya taochi sayuba

milen abener südaktsütsüla, ta Chief Minister-i ayongzüker.

Society ya 1982 nung tenzüker teimla, temeim aser voluntary service indang tesangwa ka ama aruba atema pai tenüngsang agüja liasü.

Managing Committee, staff aser volunteers temi timtem nung aliba nüburtem den yaritepba, health aser hygiene jenjang ajungketba, blood donation sentong ayongzükerba, alimar lendong-tsüdong ajurudang tali renemshia aliba aser teyari nüngdaka alir nem teyari agütsüba atema pai tushia jembi.

Kijai takok anguba indang jembidang Nagaland State Branch indang general secretary Akhale Vizol Khamo-i anibelem mesasai bendanga agütsür inyakba ajanga National Indian Red Cross Society Award - Certificate of Appreciation for Women (2022-23) sempet angu, ta CM Rio-i ashi.

"Lai iba jenjang ajangzükerba ya la kisüng tushiba masü saka Nagaland nung Red Cross indang arok tangatetba kuli sayur," ta pai ashi.

Rio-i Nagaland nung Red Cross indang züngsemtem, volunteers aser yariteper dang

pelaba lemsatep aser maneni tejangraba tulu nung nisung takum melenshitsu, aneptsütsü, tenzüksü aser temeim mapa inyakba kodanga mesamadaktsütsü ayongzüker liasü.

Iba sentong tenzüka Chief Minister den Nagaland Legislative Assembly Speaker Sharingain Longkumer, Advisor Nyusitho Nyuthie, MLA Kuzholuzo Nienu aser IRCSN General Secretary Akhale V. Khamo nungeri 'ceremonial lamp' tsükloka liasü aser Rio-i annual report 2024-2025 sayatsü.

Albert, chairman IRCS Peren district aser Nyamto Wangsha, Honorary Secretary IRCS Mon nati pei districts nung Red Cross indang ajangshibattem lemsatepa liasü.

Sentong lenir Jonas Yanthan liasü, taoba IRCSN tir aser taoba angh Asür La Ganesan bilemteta sentong tenzüker.

Dr Neizoü Khalo, Pastor Kohima Chakhesang Baptist Kehukie-i sentong tenzüka sarasadem aser Managing Committee member IRCSN Kholie Dolf-i melepzüng o jembia liasü.

## NSF aser NBCC ajanga Khammoi yimtsüng nung azüdokshi aitsür

**Dimapur, Mongputeni/Oct. 23 (TYO):** Indian Armed Forces temi drone amshia October 20 nü Konyak region anüdoklen Khammoi (Khenmoi-Loiyi) yimtsüng amakba lokti tetet balalai aitsüogo, kong civilian ana asü aser ano kar yirua liasü.

Iba lendong nung Khammoi Students' Union indang joint secretary Khampei Wangsa aser arishi küm ti tanur Khammoi Mission School nung Grade 1 nung azünger Phiphot Wangsu asü, ta Naga Students' Federation (NSF) ajanga ashi.

Civilian tem alidak 'combat drones' aser 'explosive payloads' amshiba ya Universal Declaration of Human Rights (UDHR), Geneva Conventions' aser Convention on the Rights of the Child (CRC) nung indang-indanga aibelenba lir, kong

civilian dak tenük yoker amaktsü memelar, ta NSF ajanga ashi.

Iba ama inyakyim yagi mitkar temi tashiyim amshia ajemreptsü merangba, nok-nü amshia tetsübo airdaktsüba aser linük telungzüker nung Armed Forces (Special Powers) Act (AFSPA) amala ozüng kübok aibelener memerenshi yutsüba yimya sayur, ta ashi.

NSF ajanga United Nations Human Rights Council (UNHRC) dang 'independent, international fact-finding mission' tenzüksü aser Office of the High Commissioner for Human Rights (OHCHR) dang AFSPA kübok aibelenba mapa inyakba osang agütsütsü ayongzüker liasü.

AFSPA mechi tashiyim tali amshiba memerenshiteter, aser ochi bushiba tongtipang masü

kumdaktsür. Anungji Naga nunger aliba tesem nungi AFSPA tangsa agientsü maneni akhanger, ta NSF-i ashi.

Militarisation aser sorkari yaria azüdokshiba anema maneni longkak aitba nung temaitsü ka ama, NSF-i AFSPA magien tashi federating units aser subordinate bodies aliba tesem ajunga nung armed forces den amalitep makatsü akangshir.

NSF-i mangyimer kibongtem den asükhu lemsateper aser parnok akoksaba ya arok indang zübu lir, aser democratic linük, humanitarian organizations aser nübur ajunga dang iba azüdokshi aitsütsü ayongzüker aser international criminal law frameworks kübok aibelener nem tapet temerenshi agütsütsü akhanger, ta NSF ajangasa ashi.

(Maneni tapak 2 nung...)

## Red Run 3.0 event Logo sayaba sentong agiogo



Red Run 3.0 atema Official Logo, QR code aser Official Jersey sayaba sentong nung Principal Director, NSACS, Dr. Ahu Sekhose den NOA, NSACS aser NAA ketdangsürtem tangokba noksa nung angur.

**Dimapur, Mongputeni/October 23 (TYO):** Red Run 3.0 event Logo officially sayatsü aser general category nung shilem agitsüpurtem atema entries lapoktsütsü asoshi osangbenertem den sensaksemba sentong October 23 nü Nagaland Olympic Association Office, Kohima nung agiogo.

Iba sentong ya Nagaland sorkari host süa Nagaland Olympics Association (NOA) aser Nagaland Athletics Association (NAA) na den longjemer Nagaland State AIDS Control Society (NSACS)-i ayongzükogo aser National AIDS Control Organisation (NACO), Ministry of Health & Family Welfare, Government of India-i nongita yaritsü.

HIV nokdangtsü asoshi nüburtem nem tangazükba agütsütsü, iba tashidak aketertem mesenmetui amshiba tajemba kümdaktsütsü aser HIV aser STI tem anema lokti nem shilem agidaktsütsü nükjidong nung iba sentong ayongzükogo.

Iba osangbener den sensaksemba sentong ya iba

national event lapokba sentong ka liasü, kong Red Run 3.0 official logo sayaba den Open (General) Category - 2 km run atema züngoksemtü atema QR code amenokogo aser Open Category Runner tem atema official jersey sayaogo.

Red Run 3.0 ya HIV aser sexually transmitted infections (STIs), dak sendakba nung nüburtem nem tangazükba agütsüba ajanga libaliro tajung yimya süba benshitsü asoshi inyakyimtem ajungkettsü, aser anema alitsü asoshi ajak longjemer inyaktsü atema lanurtem aser lokti nem shilem agidaktsütsü nükjidong nung ayongzükogo.

Taküm km 2 ayimjema Open (General) Category Run ka asemstü, kong asemteper 700 shi-i shilem agitsü imlar kong school, college, lanur lokti tentet, Arogo balala, sorkar department tem, NGO tem aser tanga partner tem densema lir.

Office-isa, General Category (2 km Run) nung nisung 200 atema dang online ajanga züngoksemtü lapoktsüba metetdaktsüogo, koba

mezünpur nem tama maongka agütsütsü, ta metetdaktsüogo. Pei tenüng züngoksemtü asoshi QR code scan sür online form nung agüja aliba detail tem fill up asütsü metetdaktsüogo. Maneni nisung 200 ya atongba sülen registration ya pasasa shibangatoktsü anungji tejangrartem dang takaratiba nung tenüng züngoksemtü metetdaktsüogo.

Iba den bendenloksema 10 km Competitive Category nung States aser Union Territories 35 nungi state-level champion temi (tebur ana tetsür ana) shilem agitsü.

Red Run 3.0 atema official logo, Open (General) Category - 2 km run nung züngosemtü atema QR code aser Open Category runner tem atema official jersey ya Project Director of NSACS, Dr. Ahu Sekhose; Assistant Secretary General, Nagaland Olympics Association, Neivikuolie Khatsu; Joint Director (IEC), NSACS, Ate Sakhrie, aser Honorary Treasurer, Nagaland Athletic Association, Neingulie Nakhro nungeri saya liasü.

## Maram nungi S. Ranula-i Kats Collection Top Model 2025 kokogo



**Dimapur, Mongputeni/October 23 (TYO):** Kats Collection Top Model 2025 final October 18 nü Hotel Acacia nung agiogo, koba Maram, Manipur nungi S. Ranula-i koka liasü. La nem senpet sen 1,00,000 den Kats Collection den küm ka atema contract agütsüogo.

Sub-title tem ya Viven Achumi (Rs 20,000) Miss Congeniality award, Moakala (Rs 10,000) nem Miss Multimedia award, aser Khrohiloo Koza nem Miss Beautiful Smile (sen 3,000 den Dimapur Dental Centre-i sen 10,000 alang treatment contract agütsütsü) nunger nem agütsüogo.

Tanga finalists ana nema senpet sen 3,000 agütsü. Ano

finalists trokprongla nem Dimapur Dental Centre-i sponsore süa küm ka atema complimentary oral hygiene maintenance offer agütsüogo.

Sentong nung finalist tem yagi Kats Collection nungi gown aser wedding dresse tem saya liasü. Kats Collection ya fashion brand ka lir aser parnok indang store tem Dimapur, Kohima, aser Shillong nung amenoker lir.

Sentong nungsa Tetseo Sisters, Keneisenuo Sorhie, Thunglamo Ngullie, Nouné Whourie, Ngavapmi, aser Bendang Jamir nungeria shilem agia liasü. Iba sentong ya Hornbill TV nungi osangbener aser news anchor Imnatula Jamir lenisüba nung agia liasü.

Tetendangertem rongnung

Visituonuo Rio (Brand Head, Kats Collection), Opangtongdang Jamir (Creative Director), aser Christina Moala Longkumer (Executive Director) nunger densema liasü. Tepela o jembiba mapang Keneivor-i sponsor, partner, shilem agirtem aser sentong nongita yarirtem ajak dang kanga pelaba lemsatep.

Iba sentong ya Hilypix Entertainment-i sponsor asü aser Cabin.58 aser Dimapur Real Estate na co-sponsor liasü.

Event Partner temji Shulem Boutique Hotel, Okusa Toyota, Makeup by Annalia, Nykaa, Kohima Computer Center, New Laxmi Jeweller, Dimapur Dental Centre, Nagaland Doors & Greendoor Nagaland nungeri liasü.

## Sainik School Punglwa-i AISSEE 2026 indang metetdaktsü

**Dimapur, Mongputeni/October 23 (TYO):** Sainik School Punglwa, Peren, Nagaland-i sangdong ka ajanga, linük nung Sainik School tem nung admission atema All India Sainik Schools Entrance Examination (AISSEE) 2026 indang metetdaktsüogo.

2026-27 session atema entrance tatidang ya OMR dak amendaker agiba tatidang asütsü. Tatidang agitsüba anogo ya mapang tatsüka lir National Testing Agency (NTA) website nung sangdongtsü.

Sainik School Punglwa ya Ministry of Defence indang premier institution ka lir, koba talisa Nagaland nung aliba nüburtem asoshi lir. Anungji menden shilem 67 state nungi tetsür aser teburtem atema mekazüka tokja lir aser tanungba menden 33 ya linük nung tanga tesem nungi kaketshirtem atema asütsü. School indang nükjidongji cadet tem linük Armed Force tem nung officer ama inyaktsü atema renemtsütsü asoshi lir.

2026-27 Academic Session atema Sainik School Punglwa nung ajak senteper Class VI nung menden 120 (108 tebur + 12 tetsür) aser Class IX nung menden 39 (36 tebur + 03 tetsür) asoshi

admission agitettsü. Ajisüaka kaketshirtem pass asüba aser atsüingba dak ajemdaker menden tazüing ya melenshitsü akok.

Admission ya All India Sainik Schools Entrance Examination (AISSEE) candidate tem medical fitness dak ajemdaker merit basis nung dang agütsütsü. SC, ST aser OBC (NCL) category tem atema menden 15%, 7.5% aser 27% mekazüka tokja lir. Maneni menden 25% Defence personnel tem idang ward tem atema mekazüka tokja lir, kong ex-servicemen densema lir.

Tetsür aser tebur chanutem shirnok 2014 küm April 1 aser 2016 küm March 31 tsüingda asortem lir parnok Class VI nung admission agitettsü aser tetsür aser tebur chanutem shirnok 2011 küm April 1 aser 2013 küm March 31 tsüingda asortem lir parnok Class IX atema admission agitettsü.

Applicant temi school website h t t p s : / / sainikschoolpunglwa.nic.in aser NTA website https:// exams.nta.nic.in ajanga October 10, 2025 nungi October 30 2025 tashi nung online ajanga apply sütettsü, aser online ajanga form benoktsü asoshi tatembangbuba anogoji October 30, 2025 asütsü.

## Myanmar nung Naga nunger yimtsüng amakba Tenyimi Union Nagaland-i aitsür

**Dimapur, Mongputeni/October 23 (TYO):** Tenyimi Union Nagaland-i sangdong ka ajanga, Indian security forces-i October 20 nü Myanmar nung Naga (East Konyak region) nunger aliba Khenmoi-Loiyi (Khammoi) yimtsüng drone amshia amakba aitsüogo.

Osang ajanga ashiba agi, iba yimtsüng ya Arunachal Pradesh nung amendaker amak aser iba mapang Khammoi Students' Union Joint Secretary Khampei Wangsa (27) aser Khammoi Mission School nung azünger Eli Phiphot Wangsa (7) na tepseta liasü. Iba lendong nungsa tanur tain aser tetsürtem aika yiru aser kiojen aika raksa liasü.

TUN-i, asür kinungertem den asükhu lemsatepba den yirur alirtem takaratiba nung taneptsü angutsü imlaja ataba lemsatepogo aser ano Khenmoi-Loiyi aser iba temeket nung iba lendong agi kongshir aliba Naga nungertem den parnok nokdanga aliba metetdaktsüogo.

Iba inyakyim ya meimchir temeden aser international humanitarian law anema lir, aser

iba ajanga ano India aser Myanmar nati Naga nung ali ozüing alema atsüingba sayur. Naga nunger tetsü tebou mapang nungi pei ali nung lila aliba anema jenjang agiba iba tatalokba ajanga sayur koba alima kintemi jangjatsü nüngdaker, ta parnokisa ashi.

Anungji onoki United Nations, UN Human Rights Council, aser International Criminal Court densema ken o dak sendaka aliba alima nung lokti tentettem dang iba tesem amakba ya aitsütsü aser bushisüingdangtsü akhanger, aser India nunger sepaitem danga ken o jangjashitsütsü akhanger, ta TUN-isa metetdaktsü.

Onokisa, iba tesem nung aliba Naga nungertem aser tesem balala nung prokshir aliba Naga nungertem dang iba tatalokba ya longjemer aitsütsü, humanitarian teyari agütsütsü aser iba tatalokba ajanga kongshir alirtem mesentoki parnok den nokdaktsü ayongzüker, ta Tir Kekhwengulo Lea aser General Secretary Dr. Tumda Newme nati külem sangdong ka ajanga metetdaktsü.

## NSF aser NBCC ajanga... (TAPAK 1 NUNGI...)

Khammoi yimtsüng nung October 20 nü amakba aser October 16 nü Arunachal Pradesh nung Changlang district kübok Manmao anasa Hahman yimtsüng nung 4th Assam Rifles check post amakba atema Nagaland Baptist Church Council (NBCC) ajanga khuret abenba lemsatepa liasü. Assam Rifles check post amakba atema NSCN/GPRN (Yung Aung) teloki tenüng agia lir.

NBCC-i tatalokba anaprong aitsü aser telok ajak dang Tsüngrem mesükba nung yangluba nisung takum apayutsü aser akumtsübotsü ayongzüker. Kechi yimya nung südir süaka azüdokshi aitsür aser Naga

national groups ajunga dang azüdokshi mapa yutsür democratic yimya nung Naga nunger temeden bushitsü ayongzüker, ta ashi.

NBCC ajanga Government of India dang mitkar nem mapa tamajung meinyakdaktsütsü ajungshir aser Constitution indang preamble nung zülua aliba democratic principles ama alitsü ayongzüker.

Mangyimer kibongtem, Khammoi yimtsüng nung aliba nüburtem aser Konyak region anüdoklen alirtem asoshi sarasademtsür aser asükhu lemsateper, ta NBCC sangdong ajangasa ashi.

Kerala ya 'extreme poverty-free state' ta sangdongtsü



**New Delhi, Mongputeni/ October 23 (Agencies):** November 1 nü Kerala Chief Minister Pinarayi Vijayan-i, Kerala ya 'extreme poverty-free' state, ta sangdongtsü. November 1 anogo ya Kerala state tentetba anogo lir. State yimtiba, Thiruvananthapuram nung aliba Central Stadium nung ayongzükba sentong nungji film actors aser MP tem-Kamal Haasan, Mammooty aser Mohanlal nunger tetushi tejaokertem ama adentsü. Iba sentong nungji state minister tem ajak adentsü aser opposition lenira jaoktsü. India nung kanga sensak tia

agienba mezüngbuba state ji Kerala akümtsü. Brihostibarnü Thiruvananthapuram nung osangbenertem den jembidang Local Self-Government Minister, MB Rajesh aser Education Minister, V Sivankutty nati, "Kanga sensak tia samatsüba ajanga Kerala-i maneni puti otsü tasen ka yanglur. Linük nung iba alizüng tongtetba mezüngbuba state ji Kerala lir aser alima nung iba alizüng tongtetba tanabuba region ji Kerala lir," ta metetdaksü. Kerala-i iba alizüng tongtetba nüngtem nung kasa anogo nungji state tesem

balala nung ketdangsertemi sentong balala ayongzüka agitsü. 'Kanga sensak tia' tetezü nija mesüra kibongtemi meimchirtemi nüngdakba chiyungtsü, tejenokdak, süoshi, food, healthcare aser shisaliok mengutetba dang ajar. World Bank-i ashiba agi, kanga sensak tiaji anogo shia nisung kati dollar sen 2.15 (India nunger senbo 180) mesüra iba dang nungjagi tajemba agi taküm aliba lir. India nungbo kanga sensak tiaji NITI Aayog indang Multidimensional Poverty Index (MPI) kübok lenla balala nung ajemdaker asadanger.

Opposition teloktep nungi CM candidate ji Tejashwi Yadav asütsü

**New Delhi, October 23 (Agencies):** Brihostibarnü Bihar nung opposition Mahagathbandhan teloktepi Chief Minister candidate sangdongogo; Rashtriya Janata Dal (RJD) lenir aser taoba mapang deputy chief minister Tejashwi Yadav CM candidate asütsü aser Deputy CM candidate ji Vikassheel Insaan Party (VIP) Tir, Mukesh Sahani asütsü. Bihar yimtiba, Patna nung opposition teloktepi ayongzükba osangbenertem senden ka nung lenirtemi iba osangji metetdakja liasü. Congress lenir aser election observer, Ashok Gehlot-i, "Yangi mena alir onok ajaki iba election nung Tejashwi Yadav CM candidate ama pusemtsü telemtetba agiogo," ta ashi. Paisa, iba election nung

Mahagathbandhan-i longjemer tokteptsü, aser onoki takok ngura Tejashwi indang deputy ji Sahani asütsü, ta metetdaksü. Teloktep nung aliba party tem dang pelaba lemsatapa Tejashwi Yadav-i, "Mahagathbandhan nung alirtemi sorkar akümtsü mesüra CM akümtsü atema dangbo mebilemer saka onoki Bihar yanglushiner, ibayongji onok longjema lir. Kü dak melung lemtetba atema ni Mahagathbandhan nung züngsem ajak dang pelar. Ni teloktep nung lenirtem dang ya shiner, nenoki kü dak yimlaba ama ni akok tashi inyaksü aser asenok longjemer tesüiba küm 20 tashi aliba tejenba sorkar atsüngdoktsü," ta metetdaksü. Tejashwi-isa par tsürabur ana aser taoba mapang chief minister tem Lalu Prasad Yadav

aser Rabri Devi na den Congress lenirtem- Sonia Gandhi, Rahul Gandhi aser Mallikarjun Kharge nunger dang pelaba lemsatap. Osangbenertem senden nungji BJP-i aniba NDA sorkar aija Ashok Gehlot-i, "Democratic rejutem raksatsür. Tang linük aser state tensa atema tebilemtsü akaba ya tim dang. Nenoki parnok aitsüra jail nung puoktsü. Anungji linüki kechi aginer? Linüki tang election agitsü aliba Bihar nung rangloker. Tang tensa ya kanga majung. Aluyimertem süaka, aayangertem süaka mesüra sensakertem süaka ajak timatemer. Nüburtemi temelenshi aginer," ta ashi. Bihar nung assembly elections November 6 aser November 11 anogotem nung agitsü aser November 14 nü votes azüngtsü.



Bastar, October 23, 2025: Bastar nung mendi lu ayimertemi alu aruhba sülen truck ka nungi mendi oshizükba mapang tangokba noksa nung angur.

Karnataka nung vote auyaba ken o nung SIT-i nisung trok jangjaogo

**New Delhi, October 23 (Agencies):** 2023 küm Karnataka assembly elections nung Aland assembly sector nung vote aika auya, ta tai tonglokja aliba ken o dak sendakba nung Special Investigation Team (SIT)-i nisung trok maitsü jangjaogo. Nisung trok jagi votes agientsü merang, ta SIT-i bushitetogo. Criminal Investigation Department (CID) osang ajanga ashiba agi, nisung trok jagi vote ka agienba shia sen 80 angu; votes kar tim nung agienba dak alaka tim masüba nung vote 6,994 agientsü meranga liasü.

Aland constituency ya Congress Tir, Mallikarjun Kharge'er district Kalaburagi kübok lir, aser tang iba menden nungi MLA ji Congress nungi B R Patil lir. Patil aser Kharge na jabaso aser Chittapur nung MLA, Priyank Kharge-i tangartemi votes agientsü merangbaji putetba sülen Karnataka Chief Electoral Officer nem iba osangji metetdakja liasü. Dalit nungertem aser minorities votes densema Congress indang votes 6,994 ji agientsü liasü, ta Patil-i metetdaksüba sülen CEO tetuyuba nung ibaji nokdangteta liasü.

Patil-i ashiba agi, item votes ji agien asübo pai election nung tamakok ngur lila. Iba election nungji pai BJP candidate, Subhash Guttadar madak vote tali 10,000 agi takok ngua liasü. 2023 küm Karnataka assembly election nung Aland constituency nung votes aika agientsü merangbaji ken o tulu,

ta züingshia vote auyaba ken oji bushisüngdangtsü atema Karnataka sorkari SIT tenteta liasü, ajioda Additional Director General of Police, B K Singh leniba nung iba ken o bushisüngdang.

Brihostibarnü osangbenertem den jembidang CID nungi tongti ketdangser kati, "Atangji Aland constituency nung votes aika agientsü meranga liasü. Onoki nisung 30 shi dang asüngdangyaogo aser parnok rongnungi nisung 5-6 shi dak melung kanga malemer. Parnok aputsüa akok," ta metetdaksü. Paisa, "Onoki Aland nung dang rangloker bushisüngdang, kechiyong tashishiba ken oji iba constituency nungi liasü. Ajisüaka tanga constituency tem nunga yamaji inyaker asütsüa akok," ta metetdaksü. Osang kar nung ajemdaker SIT-i melung malemba nisungtem kiojen mita ogo. Parnokisa BJP candidate Subhash Guttadar aser par jabaso ana- Santosh aser Harshananda, aser parnok indang chartered accountant kiojentem-a mita ogo. SIT-isa Subhash Guttadar'er ki anasa voter registers ronger aliba nguogo.

Osangbenertem den jembidang Guttadar-i, Diwali benjung atema ki renemshiba mapang nung kidang yaritepa alirtemi jana ajak rongdok, ta metetdaksü. Paisa, "Item documents arongba nungji tamajung tebilemba kecha maliasü. Onok tebilemba kar ali asübo onoki kidang nungi talangka pilar documents ji rongdokla," ta ashi.



October 23, 2025 nü Mathura nung Hindu nunger tamangertemi Yamuna ayong nung 'Bhai Dooj' benjung amongdang tangokba noksa nung angur.

Indian Army-i linük nung yangluba prangpong lakh 4.25 alizüktsü

**New Delhi, October 23 (Agencies):** Indian Army-i linük nung yangluba Close Quarter Battle (CQB) carbines prangpong lakh 4.25 alizüktsü atema Bharat Forge aser PLR Systems na den tezüngzüktep ka agiogo. Iba tezüngzüktep kübok Bharat Force-i item prangpong shilem 60 yanglutsü aser tanünga shilem 40 ji PLR Systems-i yanglutsü. Prangpong lakh 4 dak taliji sen crore 2,772 shi jenjang lir aser company anaprongla jagi sangküm nungi prangpongji agütsü tenzüktsü.

Linük nung yangluba carbines jenti alizükba ajanga Indian Army infantry-i prangpong tajungba amshitetsü aser 'Make in India' mapatong-a ajungkettsütsü. Prangpong tasenbaji ajanga tejenba 9x19mm Sterling carbines melentsü. CQB prangpongji kanga tepungpa asütsü. Prangpong nungji optical sights, tactical sights aser suppressors keta alitsü. Prangpong tasenbaji ajanga sepaitemi tesem balala nung tsükchirtem aser kiralongrartem den ano tajungba raratetsü.



## TIR YIMYIM YIMOBILEM (EDITRIAL)

DIMAPUR FRIDAY, OCTOBER (MONGPUTENI) 24, 2025

### Naga nunger terata !

**N**aga nunger ya yamaisa alima yimten balala kübok lemsar India aser Myanmar kübok alitsü asü(?) mesüra Naga kintem ajak longjemer yimten telatetba ka kübok tangatetep nung temzüng ozüng ka nung, linük wako ka kübok alitsü (?) ta asüba ken o lenjem ka nung rataseta telemtetba magiteti nokdak lir amai angur. Iba ama mapang ka nung NSCN-IM lenir Muivah par yim Somdal semdangba mapang, lokti senden nung Naga yimten temzüng aser wako balaka kübok Naga yimten aotsüsa, India den telemtetba magitetra, Naga yimten tebilemtsü ken o tatembang kati marutettsü ta nenshia metetdaksüba jagi, tangatetbabo akangshir saka teimla magütsür. Atangji, Naga yimten nüchiso asoshi küm papiga ya raraa arur, tesüsa Naga nunger wako-a tamshidak maka aküm aser temzünga India temzüng ozüng kübok Naga nunger alitsüsa lemtet nungbo, tongpang nungi nübortem dangi teka tazüng arur asütsü, iba jagi taginüba ajak mengutetaka nübortem dang sayutsü langkabosa bener shilangnüba agi rarabo atemer amai saka tongpang nungi meyipa marui noktaka lir. Iba tiaji tejashitsüka aser shisabolutsüka lir, kechiyong India den akhi ama rara tenzük nunga majungtsü aser Naga lima terenlok atema senotsüang aika meshir arununga majungtsü, kechiyong Naga nunger India den rarabaji terenlok mapa junga meinyaktsüba agi, tenük masüng, senotsü talila meshia raraba tongpang ka masü saka Naga nungertem ya India nunger masü, anungji Naga nunger India yimten talenba kübok malitsü ta temulungtetba nung yimten nüchiso asoshi raraba tongpang ka lir. Ajisüaka, Naga nunger tia majung, asenok India yimten kübok melii yimten nüchiso angutsübo teimla mali kümogo, kechiyong asenok yimten nüchiso bushia – bushia India-i asenok meramatsütsüsa asenok rongnung kanga mejungi telemsa adoka lir. Iba tia ya kodang asenoki bilemdangdir, teimla maliyonga Naga yimten nüchiso asoshi maneni raratsü asü (?) mesüra Naga yimten temzüng balaka maliyonga aser Naga nunger yimten wako mamshiyonga India temzüng küboksa süaka tang dang nungi jenjang tajungba ka nung alitsüsa telemtetba ka agitsü (?) ta asüba onük ana rongnung ka shimtetsüsa akümer amai reprangteter. Atangji, Naga nunger karibo Naga yimten nüchiso jenjang mengutettsüsa süra Naga yimten temzüng balaka maliyonga aser Naga yimten wako mamshiyonga India den tangatetep ken o tajung ka renemer Naga yimten tebilemtsü ya tatem küma latetner. Ibajiang ajak atema takoktsü. Ajisüaka, tang tang atemabo tamakoktsü amai akümbaji, Naga yimten temzüng ka kübok Naga yimten wako amshia Naga nunger alitsüsa India den ken o telemtetba kati arutsüba mapaba ya lir. Iba denji ano Naga nunger yimten lenirtem taküm, joko, anogo dang züngdanga ataba mapang lir. Iba ama mapang ka nung, takoktsüba ken o ka nung jet ta India den telemtetba agiadoktsübaji Naga nunger ajak asoshi kanga rungda nungdak kümogo. Atangji, tang Naga nunger yimten tia ya asenok tsüraburtemi jembia aru ama, “ anübo tair, pubo putsü aser süngbo süngpet süng,” ta asüba tensa tia den kasa lir. Naga nunger yimten lenirtem arishibo mali, ken o koka mejembitet aser telungjema melungjemteter ta kümadokogo. Iba ama tensa mapang ka nung, Naga yimten nüchiso jenjang mengutetaka, NSCN-IM teloki akangba amaji Naga nunger temzüng ka kübok Naga yimten wako amshia India den alitsüsa telemtetba kati arutsübaji tamakoktsübo masü amai bilemer. Atangji, Naga nunger mezüng tangatetba aser temulungtetbaji India dena aser India küboka malitsü, saka Naga nungertema nüchiso akaba kin ka kümteta alitsü ta ser apuso. Ajisüaka, tapusoba ama masü, len tom nung mangatetep adoka asenok kanga akoksaogo aser asenoksasa telemsaa jenti adokdaksüogo. Anungji, tapusodang jembiba ken o kasa to sa lephsia mejembii, tangatetba tasen ka nung India kübok masü India den alitsüsa yimten telemtetba kati arutsüsa, memenu dang, ajak longjemer merangdangtsüla.

## OLEMSABANG

### SHITI -THE LETTER

~ Marnungtet Ozukum

( Iba Yimdangjem otsü ya Tir Yimyim aser Bookipedia nati ayongba toktep nung mezüng takok jenjang anguba liasü.)

Kü ket nung shiti ka lir,Luroi 30 1998 anogo nung züluba .Iba shiti ya azüngdang ni temulung raksar aser sasasetter,iba shiti rongdoka adoktsü asoshi aiben kü sasa atitangogo saka kü temulungi maremtetba yong tanü tashi soita lir.

Küm aika süiogo , ozü yimdak class 8 tashidang liasü nung ni Mayangnokcha High Secondary School Mokokchungi class 9 tazüngi atu.Ni mezüng anogo class taktang nung last bench nung amen. Ni kaketshir tasen aser ano medemer shinga meyimtet kü kija class purtem yimya ajia takzü-a takponga amendang, tetsür-ka middle row last bench nung la medemtsür den kanga süngjema mener angu.Kü tenüki la dak sakloka ni la tali reprangshi nung,la dak purep lir aser la tebangmechi tekalen anasa leblosu tilaka lir ,iba jagi la medemerten jembidang menudang kanga tobur junga azü-azüa ,maneni ni reprang nung la tsüngden kolen kanga tesütep aser ko ji terongkotang tashi medem-medema mejita lir,la kanga soro tajung aser tenükshitsüka.Iba anogo nungi tenzüka class taktang nung teti ni la penzüa amen .

La ya kechi yimer?Ia ya kong alir?La ya komala tetsur ka ? ni la den oa jembi nung lai küden jembitsü mejembitsü?.item amala metet-pelanüba agi sünger ita anashi class taktang nung ni amen.La penzüa amendang ken kenbu lai ni repranger amai ni ajitet,iba yimyaji ngua lai-a ni nukshir asü ta bilema amangdang amoi junga moteti menurema nukena kazu.kenü anogo school senshiba mapang tzünglu kanga sashia aru,ku ket nung anishi liaka tsunglu kanga sashiba yong anishi jagi metizuktet nung,semtu ka anasa ken jenok.Kü kija iba semtu kazüa alidang ni sapua reprangli ozü class tsür la iba semtu tangi asema arua jenok.La kü class mate ta meteta liaka ,class nung o jembia maruba agi ni la den jembitsü akmesena koda melika kenpika nokdak .Ni asoshi tia ajungtsü lai küden mezüng menürem jakden tener lai jembi;

"What is your name?" temesünger oshi agi lai asüngdang;

"Jungshiba" ni langzu

Ni yimdak tang soa intet aser ni kaketshir tajung ka masu arina pass sua aturba tang aser englishji ni tera tang anagteter aser mejembitet.Anungji ni la tang english oshi agi na-a tenüng shiba ta asungdang nüseta masüngdangtet.

"oh,my name is Atula ,nice to know you" lai maneni jembi.

Class taktang nung lessontem agiba aser atalokbatem kati katang tera akmesena tsünglu anen ata mapang meina atonga amen.

Kenpika lir külen tsünglu kanga sashia aruba tera anen ,ni aliba para ki jibu joko ana nung tang asünung ni la nem kü anishi aponger aotsü asoshi agutsü,lai mezüngbu ken nongnang saka joko mangsema arur asünung na kidangi yakta aotsüla ta asaya menüa ni la nem kü anishi apunger yok.

Iba aonung nungi ni tepela agi amoi moiteti la den sensaksemba yimdangi arua bilema amoi moiteti anü adoktaktsü.

Iba anogo nungi tenzüka kuna O jembi tenzüka,anogoshi kati ka tali metettepa akum.Lai ku den aiben english agi tang jembir aser nibu asen oshi nung tang langzur,kechiaser ni broken english tang metet.La yamai oshi-oin nung tesangra aser yimya yimpong kanga jetbera aketbaya tsürabur tazüng tashir chir ta aser taka taiter kibong nungi asütsü ta ni takzü-a aru,saka ni latang la tsurabur kechi inyaker mesüra la koma kibong nungi asüngdangtsu asoshi nongnanga bilem.Ni latang lar kibong indang asundangra lai ku tanga meyipa ozü kibong indang asüngdangtsu aser ni ozü kibong indang ashitsu asoshi aaker.

Obala sorkar mapa tilaka liasu aser ita sen kanga tila ,talisa ozü asoshi tia maka 1989 NLTP Act ajanga kodang Naga lima ajunga nung yi yangluba aser ayokba shibangtsu,iba sülen yi jenjang tersü agi ataket aser obala itasen tilaka ajak yi aliba nung sen endok,yi meima bener senzütsübo kanga tasak saka meim mozü süngjang tilaka meima pocket nunga semer senzütsü tezübaba asünung,yi tang tamajungba aser jenjang tasakba, meim mozü achitsu tenzük ,anungji ozü kibong telungi alu aser obala arishi yakta tashitak adoka taküm tembang.Obala sürr pa indang pension yanglutsü asoshi senzüdang,rongsen jenti ao kechiaser office nung amener tulurtem nem sen mamoktsüra mapa takok mengutet ,anungji sentsü ang tali tsüsem.Kodang pension renemtet ano telungpurtemi amokmerena pension sen nungi tersü nung pezü shilembu agutsütsüla ta akang meso, magütsüra ojala onok rishikangshitsü anungji koda masu agutsu.Ojala shisabulu tia nung tang alir asünung temang nung joko tashimaiter aser kuno tetsür ka lir,la-a anebalutsüla .Iba ama meshimejung kibong otsü la tang ashitsu taaktsü tulu asünung ni latang lar kibong indang masüngdang.

(Maneni asüng adok nung...)

## TENEMTSÜNG LU YIMTI ARUNG

~ Ramok Jamir, Senior Citizen, Mokokchung

Küm 30 (thirty) tejaklen asen Ao lima Ongpangkong, Langpangkong, Asetkong, Jangpetkong tenemtsüng lu ayimba ajanga asen Ao lima koda tememenungratsüka reprangtep. Saka tang lanu putu kechi lu ayimer. Election o lu yimteper, ano yi lu ayimer, drugs lu ayimer, pei temang ayokba lu ayimer, rakzükrademba lu ayimer. Ano tsürabur kilong nung mobile lu ayimer. Yimdaklir reprangdangra noklang nung 5% dang alu ayimer, yimdaklir parnok chiyongtsü ajak town nungi dang belena chiyonger.

Anungji lanur ajaki pei yimtsüng nung alu meranga ayimtsü ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Grand Canyon University nung kaketshir 7,000-i Khrista agizük



October 22, 2025 aonung Phoenix, Arizona nung aliba Grand Canyon University nung UniteUS sentong agiba sülen kaketshirtem baptidang tangokba noksa nung angur.

**October 23, 2025:** Mongolbar aonung Phoenix, Arizona nung aliba Grand Canyon University nung ayongzükba UniteUS sentong nung kaketshir 7,000 dak temai Khrista agizükogo, ta sentong ayongzükertemi metetdaksü.

Global Credit Union Arena nung agiba sentong nungji kaketshir meyrjang aikati Tsüngrem külem aser Tsüngrem temeim ajanga aika taküm melenshiogo.

UniteUS-i sangdong ka ajanga, "Yasüng tatalokba kuli süa anguba ajanga yangi revival lir ta jangjar," ta metetdaksü.

UniteUS ya evangelistic college campus movement ka lir. Iba sentong ya US tesem balala nung aliba college/universities campus nung agia arudar.

UniteUS-isa, "Kaketshir

4,300-i tanaben Khrista nem taküm bendanga agütsüogo. Nisung 58-i tang mezüng Khrista agizük aser kaketshir 251-i baptisü telemtetba agi. Kaketshir 2,600-i parnoki college ministries nung shilem aginer ta ashi aser kaketshir 622-i parnok Arogo nung züngsem kümner ta ashi," ta metetdaksü.

"Unite GCU ya sentong ka dang masü saka Tsüngremi mapa inyakba sentong ka lir," ta ministry lenirtemi metetdaksü.

UniteUS tentetla Tonya Prewett, pastor Jonathan Pokluda aser IF:Gathering tentetla, Jennie Allen nungeri linük tesem balala semdanga kaketshirtem den Khrista osangtajung lemsatepa arudar.

Grand Canyon University nung ayongzükba UniteUS

sentong nung adener kaketshir kati, "Taküm melenshiba aonung ka. Ni tammang nung nemzüa liasü aser taküm aliba tetezü memeteti liasü. Kü taküm atema Khrista sentong lir ta ni tangbo metetogo," ta ashi.

Grand Canyon nung ayongzükba sentong nungji Khristan kentener Forrest Frank-a jaoka liasü. Frank-i pai pa taküm rangben Khrista nem agütsütsü telemtetba agiba taküm kuli lanurtem den lemsatepa liasü.

Kaketshirtem den jembidang Prewett-i, "Nü taküm minute ka danga amajok nung melalutsüla. Yisu nem nü taküm agüjang; ajak bendanga agüjang," ta ayongzüka liasü.

Tesüiba ita ka tsüngda UniteUS sentongtem nung kaketshir 22,000 dak temai Khrista agizükogo.

## ANOGO ABEN TSÜNGREM DEN

### Nüngtugu temoatsütem

Iba ken nung temepishiba kecha mali, tenüng asangba dang. Mezüngbuba temoatsüji tatok agütsüba (t.3). Ken züluri tatokbaji tanela nung anema aliba ta zülü. Asenok temsüa meliaka Tsüngremi asenok anebtsür, aser temoatsü ajak agütsübaji alangzükba lir. Temang nung tanebtsü kechi lir, tanela nung tanebtsüji tekümtet (tatok) ji lir. Yisu asenok Tanebtsür Tulu lir (Ef. 1:7).

Tanabuba temoatsüji alangzükba (t.4). Alangzükba kin ka alangzükba lir. Rut kaketi iba tatishitsüji sayur. Boaz kin ka alangzükba ka liasü. Tsüngremi wabanger aser moatsür, aser asenok kümzüka ayur. Pai asenok alar tia nungi tematiba jenjangi atsüket.

Tasembuba temoatsüji teperiba (t.5). Pai na tambur akümdang tajung agi tiptemdaksür. Tsüngremi agizüker aser tasen kümdaksür. Tanelaren asenok asangur/aiür kümdaksür, kechiaser asenoki Pa nung jangra atemer.

Na Tsüngremer tatok aser talangzükba kar ma? Yamaji süra, nai Pa metetba aser Pa O nung tashi angaba nungi aruba nung temulung süa pelaa lir ma? Nai tangar moatsütsü Tsüngremi na agizüker, tasen kümstsür aser moatsür.

## Taoba mapang SBC Tir Morris Chapman süogo



Morris H. Chapman

**October 23, 2025:** Taoba mapang Southern Baptist Convention (SBC) nung lenir, Morris H. Chapman alima nungi pilaogo; pa arrshi küm 84 liasü.

Pa ya SBC Executive Committee nunga Tir inyaka liasü.

Pa arrshi küm 85 ajungtsü hopta ana shi dang lia Hombarnü asü.

SBC EC Tir, Jeff Iorg-i, "Morris Chapman-i tejangraba tulu nung SBC ania liasü. Pa ya amalitepa inyakba aser alima mission nung takutet lenir ka liasü," ta metetdaksü.

"Pa ya medemer tajung ka liasü. Tesüiba küm aika pai ni ajungmesoa aruogo. Onoki pa nem akhüm agütsür aser par kibong atema sarasademsür," ta Jeff-i metetdaksü.

Taoba mapang SBC Ethics & Religious Liberty Commission Tir, Dr. Richard Land-i, "Morris ya tasütait aser ochishir lenir ka liasü. Southern Baptists atema pa aser pa kinüngtsü, Jodi na ya kanga senti liasü," ta metetdaksü.

Chapman ya 1940 küm Thanksgiving Day nü

Kosciusko, Mississippi nung aso. Pai Southwestern Baptist Theological Seminary nung Master of Divinity aser Doctor of Ministry renema liasü aser SBC indang First Baptist Church (Wichita Falls, Texas) nung pastor inyakba densema Arogo aika nung pastor inyakogo.

Pa küm ana tashi SBC Tir inyakba sülen 1992 küm nungi 2010 küm tashi SBC Executive Committee nung Tir inyak.

Küm asem tejaklen Southwestern Seminary nung sentong ka nung jembidang Chapman-i, "Asenok nükjidong rongnung kaji, asenoki Yisu metetba ama tangar nem-a Pa meteta kümdaksütsü atema lir," ta ayongzüka liasü.

Chapman-i, "Ni Tsüngrem dang 'ni sayutsüngi mesüteter' ta ashi. Tsüngremi kechi inyakar meteter ma? Tsüngremi kü dang 'Ni na sayutsüngitsü atema jatettsü' ta ashi. Ni Pa dak shilem 99 amanga liasü. Ajisüaka Pa tajung. Tanübo Tsüngremi tongmelang nisung ka ajanga mapa tulu inyakba taküm kuliji ni lir," ta metetdakja liasü.

## Khristan lenirtemi Trump dang Nigeria CPC nung züngoktsü mepishi

**October 23, 2025:** Taoba hopta US nung Khristan lenir 30 dak temai shidi ka ajanga US Tir, Donald Trump dang Nigeria nung yimsü temeden anema inyakba aser Khristan jenti tepsetba atema iba linük ya Country of Particular Concern (CPC) nung züngoktsü atema U.S. Department of State dang tuyuang, ta mepishi.

Tamangba yimsü temeden anema inyaksü melaba mesüra inyakba linüktem CPC nung züngoker aser item linüktem anema tenokdangba balala benoker.

CPC list ya 1999 küm tenzüka liasü saka 2020 küm tashi Nigeria ya CPC nung mezüngoki liasü. Iba sülen 2021 küm Nigeria ya CPC list nungi agien, ajisüaka tang tashi iba linük nung Khristanem atema tensa tajungba makümer.

University of Nigeria, Enugu Campus nungi Enweonwu O. Anthony-i, "US sorkari Nigeria ya CPC nung züngoktsü memelungba ya yimtenren mesüra asalentong tsütsülen nungi asütsüa akok. Nigeria nung totzü jenti aliba aser

asalentong tsütsü tongtibang asüba agi US sorkari meimchir temeden dang nungibo yimtenren tongtibangba kümdaksür," ta ashi.

Detroit, Michigan nung aliba Sacred Heart Major Seminary nung professor, Robert Fastiggi-i, "Mezüngbuba nung, Nigeria ya 'Country of Particular Concern' ta sangdongtsüji kanga tongtibang. Ibaji ajanga 'tamangba yimsü nung ajemdaker kiralongrabaji US-i anemer', ta alima dang sayutsü," ta metetdaksü.

US sorkari CPC linüktem anema temerenshi tapu 15 shi benoker, aser item rongnung tongtiji rongsenkettisüng dak sendakba tenokdangba lir.

Fastiggi-i, "Rongsenkettisüng dak sendakba tenokdangbatemji ni-a pelaa agizüktsü, ajisüaka ibaji ajanga tai maliba nüburtembo mekongshitsüla," ta ashi.

Khristan lenirtem jagi shidi ajanga US Tir Trump dang, tang Nigeria nung tebilemtsü onükji Fulani Muslim nungertemi aluyimer Khristanem jenti tepsetyonga sorkari ibaji

nokdangtsü atema kecha meinyakba ya lir, ta metetdaksü.

Nigeria Middle Belt region nung aliba Benue state nungbo taküm küm tenzüker tang tashi nung Khristan 1,000 jungnüa tepsetogo, ta shidi nungji shia lir.

Nigeria nung prangpong dak sendakba ozüng tesashi lir, ajisüaka iba ozüngji Fulani Muslim nungertem anema benoker, ta parnokisa metetdaksü.

Iba dak alia Nigeria nung Khristan lenirtemia "Fulani jihadists" ya Entity of Particular Concern (EPC) nung züngoktsüla, ta temepishiba agütsüogo.

Fastiggi-i, "Nigeria nung Khristanem amakba anema Muslim nunger lenirtemi ola adoktsüla aser aitsütsüla. Alima tesem aika nung Islam yimsü nung ajemdaker ozüng alema inyakbaji Muslim nunger lenirtemi aitsür," ta metetdaksü.

Khristan lenirtemisa Trump dang, 2009 küm nungi tenzüka Nigeria nung Islamic kiralongrartemi Khristan 50,000 dak tali tepsetogo, ta metetdaksü.

**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Tokusük**

(v) ana kuma raksa, pasasa süktang (break by itself)

\* Tsüraburtemibo arem nungi süng tokusük kidangi bener matok.

**Tokzük**

(v) khu mesüra pongdang nungi agizük

(remove something from long container or basket)

\* Khu nungi manü tokzük aser bongdang nungi ango tokzük.

**OLONG PAITEP # 7308**

|    |  |   |    |    |  |    |   |    |  |   |
|----|--|---|----|----|--|----|---|----|--|---|
| 1  |  | 2 |    | 3  |  | 4  | 5 |    |  |   |
|    |  |   |    |    |  |    |   |    |  |   |
|    |  |   |    | 6  |  |    |   |    |  | 7 |
|    |  | 8 |    |    |  |    |   |    |  |   |
| 9  |  |   |    | 10 |  | 11 |   |    |  |   |
|    |  |   |    |    |  |    |   |    |  |   |
|    |  |   | 12 |    |  |    |   | 13 |  |   |
|    |  |   |    |    |  |    |   |    |  |   |
|    |  |   |    |    |  | 14 |   |    |  |   |
|    |  |   |    |    |  |    |   |    |  |   |
| 16 |  |   |    |    |  | 17 |   |    |  |   |

**TIPIEN**

1. Nisung jenti
4. Tsük rudenba
6. Temzüng tesashi
8. S\_\_\_i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

**LANGTSÜNGLEN**

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

**OLONG PAITEP # 7307 TELANGZÜBA****TIPIEN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

**LANGTSÜNGLEN :**

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

**NAI-A YA METETTER**

Arishi küm 17 tain Lennart Karl-i Bodhbarnü Champions League nung Club Brugge den asayaba mapang minute pongu tsünga goal ka idakja pa ya Bayern nungi Champions League nung goal idaktsürtem rongnung tanobusang kümogo. Pai Jamal Musiala-i record yanglur aliba ajatetogo. Jamal Musiala.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Kokrajhar nung train lenmang poksatsüba ajanga minprong adok**

**Guwahati, Mongputeni/October 23 (Agencies):** October 23 anepdang Assam nung Kokrajhar district kübok Salakati aser Kokrajhar station na tsünga railway track poksatsü asütsü ta temlung melemi bilemba sülen Northeast Frontier Railway (NFR) lenmang nung train senzusenpong nung tetsüdkaktsü adoka liasü.

NFR indang Chief Public Relations Officer (CPRO) Kapinjal Kishore Sharma-i ashiba agi, anepdang züngia 1:00 ako meta khu abenba train ka iba tesem süia aoba mapang local pilot aser train manager nati ola tulu ka angashiba den train anokshiba ajangshia liasü.

Iba sülen tenati train lenmang asadangtsü atema train anendaktsü.

"Train lenmang asadangba

sülen track aser sleepers raksar aliba nguteta liasü. Train lenmang ya poksatsü asütsü ta temlung melemi bilemer. Railway Protection Force (RPF), Government Railway Police (GRP), aser state police nem idangjisa osang agütsü aser bushisüngdang tenzüka liasü," ta CPRO-i ashi.

Railway engineer temi takaratiba nung lenmang yanglushi aser anepdang 5:25 ako tashi nungbo lenmang yanglushia train tem senzusenpong tenzüka liasü.

Iba mapang tsünga train ti senzusenpong minpronga liasü. Train tem ya ghonda ka nungi ana tashi menomeyanga liasü. Ketdangsürtemi ashiba agi, passenger tem kümzüka toktsütsü atema train tem ya station tem anasa anena atadaktsü.

Iba tatalokba sülen Northeast Frontier Railway-i, lendong agi kongshitsü ana nung aliba tesemtem tali tajungba meita atadar aser patrol tema tali senzüdaktsüdar.

Iba amala lendong ataloktsü aliba nungi jenboa alitsü atema RPF nungi personnel talila aser engineering team tem yokogo.

"Iba tatalokba ya state police-i RPF aser GRP team tem den longjemer kanga junga bushisüngdangdar," ta Sharma-i ashiba den nüburttem teküzmükba kübok toktsütsü atema inyakyimtem ajak benoka inyakdar, ta shisem.

Lenmang ya kechi agi koda poksatsü aji mejangja, saka ketdangsürtemi iba ya security dak sendakba nung tebilemstü tulu ka ama agir, aser kechi atema lenmang raksatsü aji ngutettsü merangdar.

**Manipur nung UTV züngsem ana apu**

**Imphal, Mongputeni/October 23 (Agencies):** India security force-i Manipur, southern Chandel district nung Chakpikarong police station kübok Chakpikarong anasa Salluk nung United Tribal Volunteers (UTVs) tesepe ka nungi züngsem ana puogo.

Official sangdong ka ajanga Brehostibarnü ashiba agi, sepaitemi pua aliba UTV züngsem ana ya Manipur nung Churachandpur district nungi arrtsü adener Myanmar kübok Tamu tesemi oya aliba mapang October 18 nü apu.

Sepaitemi apuba nisung ana tenüng mesangdong saka ken o maneni buhisüngdangtsü atema

tena ya Chakpikarong Police nem bendanga agütsüogo.

Ken o ashishiba mapang sepaitemi pua alisang ana yagi ashiba agi, UTV puri Manipur nung Kuki-Zo nunger aliba tesem asoshi administration balaka akhangar.

Iba telok takhangba nung Union Territory balaka aser Kuki-Zo nunger atema legislature ka akhangba densema lir.

Parnok takhangbatem ataloktsüra parnok indang prangbong injang tem bendanga agütsütsü mulunga aliba lemsatepogo.

Parnok takhangba tem rongnung ya Kuki-Zo nunger

aliba tesem asoshi administration balaka amenoktsütsü (Union Territory den legislative tashi), item tesemtem nungi Manipur police agintsüba, Meitei nunger teloktemi prangbong injang auyar or aliba bendanga agütsütsüba aser Kuki-Zo village volunteers tem nem temzüng ozüng kübok teküzmükba agütsütsüba densema lir.

Iba telok yagisa, kija aser lokti tentet kari danga administration balaka mamenok tsünga sorkar ajanga parnok anema inyaksangshirtem den ken o angatetteptsü merangra majungtsü ta tekümdangtsü metetdaksüogo.

**Dampa assembly bypoll atema candidate 5 scrutiny ajangtetogo**

**Aizawl, Mongputeni/October 23 (Agencies):** Mizoram nung Mamit district kübok Dampa assembly constituency bypoll atema nomination paper benokba candidate pongupronglai scrutiny ajangtetogo, ta ketdangsürtemi Bodhbarnü metetdaksüogo.

Mizoram indang Chief Electoral Officer (CEO), Lalrozama-i, Zoram People's Movement (ZPM) nungi Vanlalsailove, Mizo National Front (MNF) nungi R.

Lalthangliana, Congress nungi John Rotluangliana, BJP nungi Lalhmangaiha aser People's Conference nungi K. Zahmingthanga nungeri benokba nomination paper tem Returning Officer Malsawmzuala-i asadangba metetdaksüogo.

Lalrozama-isa, candidacy agintsü atema tatembangbuba anogoji Hokolbarnü asütsü ta metetdaksüogo.

Maneni pai, bypoll atema inyakyimtem ajak takok ngua renemyonga odar aser Centre

sorkari election ketdangsütsü atema observer asem nem mapa nongloksüogo, ta metetdaksü.

"Tang tashi nungbo election nung tokteptsü aliba party kati danga model code of conduct nung aibelenba mali," ta Lalrozama-i shisem.

MNF MLA Lalrintluanga Sailo July ita asüba sülen Dampa assembly constituency atema election agishitsüsa aküm.

Iba election nung tetsür 10,185 densema voter 20,790 shi-i shilem agitsü temsüa lir.

## Tunisia tzükum anasa rong makepok, migrants 40 asü



**Mahdia, Mongputeni/Oct. 23 (Agencies):** Tunisia tzükum anasa migrants indang rong ka makepokba nung tanurtem densema migrants 40 asü, koba region nung taküm tzüyim lendong tulutiba rongnung ka lir ta ketdangsür temi ashi.

Migrants 70 shi bena aliba rong ya central Tunisia nung Mediterranean rongnendak Mahdia anasa makepok, ta ketdangsür temi ashi.

Iba rong nung mena alir ajak ya sub-Sharan Africa nungi lir, ta ketdangsür temi ashi.

Migrants tem Africa nungi Mediterranean ajanga Europe-i aotsü merangdang lendong

atalokba rongnung ibai tesüsaba alitsü.

2023 küm nisung 210,000 dak temai Central Mediterranean ajangtsü merang, ta UN indang data ajanga ashi.

Nisung 60,000 dak tema pua African tzükum leni meyipa yok aser nisung 2,000 jungnüa tzüyim nung takum sama.

Bodhbarnü lendong nung migrants 30 shi takum kumzük.

Tunisia ketdangsür temi tzüyim nung rong makepokba indang bushisüngdang tenzüikogo.

Rara aser makamait mechi Europe nung maongka tajungba bushia aruba migrants tem

ketdang asütsü atema Tunisia nung tebilemtsü tuluba akumer.

Africa aser Europe tsüngta tzüyim ajanga senzüba lenmang ya alima nung tamajungtiba lenmang lir.

February ita Tunisia indang Sfax yimti anasa rong ka makepokba nung Sudan nunger nisung 40 dak tema asü.

2023 küm European Union-i migrants azüoktsü atema Tunisia den tezüngzüktep ka zülutepa liasü.

Iba tezüngzüktep nungya shibelenba anentsü, arütsü tashi itshitsü aser migrants tem meyipa yoktsü atema sen \$118m (£90m) dena lir.

## Khartoum nung RSF drones-i asemnü buba amaker

**Khartoum, Mongputeni/Oct. 23 (Agencies):** Küm ana buba nung mezüngbuba passenger flight arua anener anogo ka lir paramilitary Rapid Support Forces (RSF) ajanga Sudan yimtiba Khartoum aser yangji aliba airport tongtiba nung amaker.

Sorkar den sendaktepa aliba Sudanese Armed Forces (SAF) ajanga Brehostibarnü drones kar khazüka yok, koba ajanga ki o jen raksatsü, ta mitkar ketdangsür kati ashi.

Tenük kuli alirtemi ashiba agi, Khartoum nung anepdang 4:00 ako meta drones ana ola angashi aser mapang tatsüka tsüngta apok.

Mongulbarnü nungi tenzüka iba airport nung drones amshia aiben amaker, koba RSF tenüng asener.

Taoba hopta Khartoum northwest tsütsü army bases ana dak tenük yoker drones agi amak, ajisüaka mitkar ketdangsür temi iba tayimtsü timba khazüka yok ta ashir.

Mapa ka tesendaktep tajung aliba SAF aser RSF tsüngta 2023 küm nungi kati ka anema nokdaka Sudan nung civil war tenzüka tesem ajungalen raraa arur.

Sudanese mitkar temi March ita linük yimtiba ya paramilitary force nungi tanaben agi, saka Khartoum International Airport yanglutsü ita aika agia liasü aser yangji local Badr Airlines indang

tayimtsü ka Bodhbarnü arua anena liasü.

Iba airport tanaben lapoktsüba sentong mapang telatet makai thinenogo, ta airport ketdangsür kati osangbener dang ashi.

Sudan nung rara ajanga nisung meyrirjang aika takum samaogo aser nisung million 12 shi pei ki yutsür tesem balala nung jenshia lir aser nisung million 30 shi humanitarian assistance nüngdaka lir, anungji ibai alima nung humanitarian crisis tulutiba akum.

International Organization for Migration aser danga United Nations agencies temi tangsa tsükchitep anentsü aser civilian tem, aser talisa tanurtem kumzüka ayutsü aser rara agi kongshia alir ajunga nem tetsükdak magütsüi humanitarian teyari agütsütsü ayongzüker.

Rara agi tesashitiba kongshiba tesemji North Darfur province yimtiba el-Fasher ya lir, koba küm ka dak tema sapanger makyonga arur. UN aser danga aid groups temi iba yimti nung civilian 260,000 shi taolen makai sapanga lir ta ashir.

"Tan hopta Darfur nung tanurtem yasa-tzüra ajurua, tashidak balala agi meneper tongtipang services ajunga anener aliba ni nguogo," ta UNICEF indang deputy executive director Ted Chaiban-i sangdong ka nung ashi.

## US Tir Donald Trump-i Russia asoshi sanctions tasen benoker

**Washington, Mongputeni/Oct. 23 (Agencies):** Ukraine den yimjung tezüngzüktep asoshi jembishinü akatsü Moscow ajungshia US-i Russia indang totzü company tulutiba ana nung tenük yoker sanctions tasen sangdongogo.

US Tir Donald Trump-i Budapest nung Russia Tir Vladimir Putin den senden ka amentsü sentong aliba mapang telatet makai athir ta shir anogo ka lir iba sangdong ya agütsü.

"Ni Vladimir den jembi shia, ni kanga junga sensaksem akar aser iba sülen telemtetba kecha malir," ta Trump-i ashi.

Iba temerenshi ajanga Russia indang rongsenketzüng nung kongshiba kanga tulubo masütsü, saka ibai Trump indang foreign policy nung temelenshi tulu alitsü, shibai European linüktemi Russia nungi totzü aliba manen tashi sanction magütsütsü ta shia lir.

Kremlin-i Russia ya sanctions agi kecha mesütettsü ta ashir.

Trump-i aiben Moscow anema mera tesashiba agütsütsü amokmerena arur, saka küm asem ser tesadang raraba anendaktsütsü asoshi tetsüngtai ia tezüngzüktep yanglutsü teimla nung tenokdangba magütsüi arur.

Joe Biden-i akokba



lenmang nung Ukraine yaria aruba sülen Trump indang administration-i US ya linük ana tsüngta yimjung apular ama inyaktü meranger.

Ajisüaka Kremlin-i jenbishinüba nung tejakleni mera maoba mechi US tir tali jashir.

Iba sanctions agütsütsü ya Ukraine Tir Volodymyr Zelenskyy-ia ita aika ajungshia aru. Iba ya US nungi "signal" tajung ka lir, aser danga linük temia Russia nem pressure tali agütsüra ceasefire alitsü, ta pai ashi.

Putin-i yimjung yanglutsü atema temulung magütsür aser sanctions ajanga ang arakzütsü imlar, ta Trump-i Bodhbarnü ashi. "Mapangji tangya amai nibo bilemer. Asenoki mapang talangka ataogo," ta pai ashi.

Pai iba sanctions package ya kanga tulu aser Russia-i rara anentsü mulungra yakta agientsü ta ashi.

"Iba tamachi rara tembangtsü Putin-i memulungba ajanga sanctions ya nüngdaker, ta US Treasury Secretary Scott Bessent-i ashi.

Sanction agi kongshiba oil companies - Rosneft aser Lukoil - yagi Kremlin indang "war machine" nem senotsü teyari agütsür ta pai ashi.

Russia lima nungi bendang lima nung bener oa ayokba rongnung totzü aser gas ya timtiba lir. Russian oil firms ana yagi anogo ka nung totzü 3.1 million barrels bendang limai yoker. Russia nung totzü atsüba tesadang ka jungnüa Rosneft ajanga lir, koba alima nung amshiba totzü shilem 6 lir, ta UK sorkari asadangteta lir.

Moscow indang customers tulutiba rongnung China, India aser Turkey dena lir. Trump-i item linük danga Russia nunger totzü malitsü ajungshia lir.

Ukraine-i Russia indang rongsenketzüng nung timtem agütsütsü meranga par oil refineries aser energy infrastructure nung tenük yoka arur.

Russia linük telung nung maktettsüsa long-range Tomahawk missiles meshitsü atema Zelenskyy-i Hokulbarnü White House semdang, saka teka tazüng meyipa shilang.

Aji masüdang Trump-i Putin den ajungbena phone ajanga jembiba sülen Hungary nung tena ajuruteptsü tebilemba lir ta sangdonga liasü.

Ajisüaka US Secretary of State Marco Rubio aser

Russia Foreign Minister Sergei Lavrov tsüngta phone ajanga jembiba sülen iba sentong soit aser Trump-ia amajok nung senden memenner ta shia liasü.

Iba sülen Trump-i, missiles ya kanga tepenja aser amshitsü atema küm ka training tesashi agitsü nüngdaker, ta shia liasü.

Bodhbar aonunga maneni rara liasü aser Ukraine yimtiba, Kyiv nung amakba nung nisung ana asü ta ketdangsür temi ashir.

Bodhbarnü Russia-i tesem balala nung bomb tesashi pokloktsüba ajanga tanur densema nisung tenet tepset.

Taoba hopta UK-ia iba mesük Rosneft aser Lukoil nem sanctions agüja, Chancellor Rachel Reeves-i alima nung Russia nunger totzü ayokdak maka ta ashi.

London nung aliba Russia indang embassy ajanga ashiba agi, par linük indang energy company tulu nung tenük yokba ajanga alima nung totzü supplies nung timtem ajurutsü aser alima ajunga nung totzü jenjang timba akumtsü.

Moscow-i tashi ajak amshia Ukraine amak tenzüka sülen Europe-i Russia nunger totzü nung metaloka aliba kanga ajemogo, saka tang tashi EU linüktemi gas agiba shilem 13 tashi Russia indang lir.

## Capt. Kenguruse MFT: Lüshe FC aser Headhunters FC nati takok angu



**Kohima, Mongputeni/October 23 (TYO):** 9buba Captain Kenguruse, MVC Football Tournament tenzük tananübuba Lüshe Football Club aser Headhunters FC nati pei tata asaya kokogo. Iba asayamung ya 45 Assam Rifles-i ayongzüka Indira Gandhi Stadium Kohima nung asayadar.

Brehostibarnü mezügbuba asaya nung Lüshe FC-i goal 6 agi Auyang FC koka liasü.

Iba asaya ya Lüshe FC-i tetenzük nungi tatembang tashi amokbanger asaya. Asaya nung mezügbuba goal ya Tohika-i minute 11buba nung idaktsü. Par telok nungi Thulunso-i kanga junga asaya-

a minute 28, 40+3rd, aser 52buba nung goal asem idakja hat-trick ka agütsü.

Maneni asaya nung Shovelo-i minute 73buba nung goal pongububa idaktsü aser minute pongu dang lir minute 78buba nung Eneibe-ia par team asoshi goal trokbuba idakja Lüshe FC-i asaya ayong ayonga koka liasü.

Tanabuba asaya nung defending champions Headhunters FC-i goal 14-0 agi Detroit FC koka liasü.

Whistle apuli nungi Headhunters FC puri iba asaya attack süa asayatsü tebilemba aliba sayu aser parnok atema Manton-i minute 2buba nung mezügbuba goal idaktsü.

Iba asaya nung Laiwang-i ajak dang nungi alia goal kanga junga idakja asaya-a pai minute 8, 17, 36, 38, 50, 69, 79, aser 80+1buba nung goal ti idakja liasü.

Maneni Headhunters FC nungi asayar Chingsha-ia minute 61 aser 74buba nung goal ana idaktsü aser Haotingmang (71'), Zarenthung (72'), aser Visakho (76') nungeria goal kaka idakja parnoki asaya ayong ayonga akok.

### October 24 nü asayatem:

1. Nagaland Police vs Dimapur Sporting Club @ 10am
2. Langsa Hill FC Mon vs Wokha District Ex-Serviceman League Club @ 12Noon.

## Ind vs Aus: Australia-i tanabuba ODI asaya wicket 2 agi kokogo

**Mongputeni/October 23, 2025 (Agencies):** Brehostibarnü India aser Australia na tanabuba asaya Australia-i wicket 2 agi koka parnoki iba asayamung 2-0 agi kokogo. Team ana tsünga tatembangbuba ODI asayatsü anunga lir.

Mezügbuba asaya den apitepra bowler tem nem teyari timba agütsüba condition ka nung India nung asayartemi tanabuba ODI bo kanga junga asayaago.

Mitchell Marsh-i toss akok aser mezügbuba ball aontsü shim aser iba sülen Mitchell Starc, Josh Hazlewood, aser Xavier Bartlett nungeri India nung batter tem nem timtem agüja liasü.

Captain Shubman Gill run junga meyangluteti out asü aser Virat Kohli iba asaya nunga duck achi. Rohit Sharma-i asaya kanga meyilongi tenzüka asaya saka pa-a run 73 dang yanglur out asü. Batter tem rongnungi Shreyas Iyer-i run 61 yanglua team nem teyari agütsü aser

Rohit Sharma den senteper run 118 yanglua liasü.

Asaya nung Adam Zampa-ia ball kanga junga ona Shreyas aser KL Rahul na atongtepa out sütsü. Axar Patel-ia junga asayaago saka pa nem teyari agütsür maliasü, kechiyong Washington Sundar aser Nitish Kumar Reddy natia junga masayatet.

Iyer out asüba sülen India nung asayartemi junga masayatet. Asaya atemtsü anasa India team-i asayar 8 out sür run 226 dang yanglur liasü, saka Harshit Rana (run 24\*, ball 18) aser Arshdeep Singh (run 13, ball 14) na senteper run 37 yanglua parnoki over 50 nung asayar 9 out sür run 264 yanglua liasü.

Australia atema Zampa-i run 60 agütsür wicket 4, Bartlett-i run 39 agütsür wicket 3, Starc-i run 62 agütsür wicket 2 agi. Hazlewood-i wicket ka danga magi, saka pai over 10 nung run 29 dang agütsü.

Australia team batting

amenba mapang Travis Head aser Mitchell Marsh nati mapang agia dang asaya tenzük, saka March kanga kara out süatok aser iba sülen mapang tatsüka dang lir Head-a Harshit Rana-i out sütsü.

Iba sülen Matt Short aser Matthew Renshaw nati asaya yanglushia liasü. India team fielding majungba ajanga Short anaben tashi pupetba sülen pai half century yanglu. Short out asüba sülen Mitchell Owen-i asaya takaratiba nung tembangtsü meranga asaya aser kasa mapang nung Cooper Connolly-i kanga süngjemshir asaya-a pa indang career nung ODI nung mezügbuba half century yanglua liasü.

Wicket kanga kara out süaka Xavier Bartlett aser Owen, Connolly nungeri Australia team takok dangi ania liasü.

2008 küm nungi tang tashi nung India team Adelaide Oval nung khen danga tamakok mongui asaya aliba tang mezügbuba tamakok nguogo.

## Bahutule Punjab Kings spin bowling coach kümogo

**Mongputeni/October 23, 2025 (Agencies):** IPL season tasen metenzük tsünga Indian Premier League franchise Punjab Kings-i, taoba mapang India team nungi leg-spinner Sairaj Bahutule spin bowling coach asütsü shimogo.

Arishi küm 52 tain Sairaj-i Sunil Joshi melenogo, shiba 2023 küm nungi team nung inyaka liasü. Bahutule ya küm aika domestic cricket nung asayaba aser coaching nung tajangshiba peria bener aliba nisung ka lir.

Bahutule asaya aliba mapang India team nungi Test ana aser ODI ti nung asayaago aser iba den pa ya India nung first-class cricket nung ajaki jangja aliba bowler ka liasü. Asaya nungi anenba sülen pa coach aküm aser Kerala, Gujarat, Vidarbha, Bengal aser IPL nung Rajasthan Royals nung coach mapa inyakogo.

Punjab Kings CEO Satish Menon-i pa shimba ya pelashishia agizükogo aser Joshi mapa tajung asoshi pa tenüing sanga liasü. "Kümtem tsünga Sunil Joshi-i Punjab Kings atema bendanga agüja tenzüka atema kanga pelar. Maneni onoki Sairaj Bahutule pelashishi agizüker," ta menon-i ashi.

Bahutule indang jembiba mapang Menon-i, "Sairaj-i asaya kanga junga angatetba aser talisa domestic bowler tem anitetba nung aser tasa balala ketdang asüba nung pa tajangshiba ya ozü team asoshi kanga senti asütsü. Season tasen tenzüksü lia bowling unit tajung ka tentettsü asoshi onok nükla aliba den pa tajangshiba ya kanga puteper," ta ashi.

Mapang tasen agizükba indang jembiba mapang Bahutule-i, "taruba IPL season atema ni spin bowling coach ama Punjab Kings nung adenba atema kanga pelar. Iba team yagi cricket brand balaka asayar aser takok ngua renloka aotsü lenmang sadema lapoka aliba angur," ta pai ashi.

Paisa, "parnok team nung sempet tajung aketba asayartem ishika lir, aser parnok sempet arangtetshidakja temaba jenjang tongdaksütsü atema teyari agütsütsü yongya atar," ta ashi.

Taoba IPL nung Punjab Kings pur tanabuba jenjang nung tembanga liasü. Final nung parnoki Royal Challengers Bengaluru makok. Iba takok dak ajemdaker parnok taruba IPL asayatsü renemba mapang tang temelenshi balala bener arudar.

## 27 Buba MDFA Trophy tananübuba Semi Final Osang



Telongjem FC aser Chargers FC tsünga tanabuba Semi Final asayaba mapang tangokba noksa nungji angur.

**Mokokchung, Mongputeni/October 23 (TYO):** Imkongmeren Sports Complex Mokokchung nung tang asaya aliba 27Buba MDFA Trophy tanü nung tanabuba Semi Final asaya Telongjem FC aser Chargers FC tsünga asayaago.

Iba asaya nung Match Patron ji OSD (Sports) Youth Resources & Sports GoN liasü.

Iba asaya tenzük kelen telok katia dang goal magutsüteti anisüngzüka mapang agi. Iba sülen ano tanaben ground-i aita asayaba mapang nung telok anaprongla kanga dang merangtepa asayatep aser

asaya atemtsü lia minute 84buba nung Chargers FC telok nungi J.no-12 Illangeri goal ka yokteta iba goal jagi Chargers FC goal 1-0 agi Telongjem FC akok aser taküm MDFA Trophy Final asayatsü asoshi maongka ngutetogo.

27Buba MDFA Trophy final October 25 nü nikongdang 1:00 ako nungi Chargers FC aser Doyang Strikers MKG tsünga asayatsü.

Iba sentong nung tetushi tejaoker DMC Councillor, President, Longtrok FC. President NPF Youth Wing Dimapur Division alitsü.

## BILEMDANGANG

"Takok aser tamakok agi shinga mebendanger."